

樂志堂文集

樂志堂文集卷五

南海譚瑩玉生撰

金花夫人神弦曲序

高禰之祀厥風古矣若夫祈子龍門遽徵魚躍求男漳
水乃夢豹來貴如皇甫錢輪魔母之堂達似眉山環易
張仙之像綦授戶外而泰伯生羣漪水所而世甯誕由
來禋祀亦兆機祥嶺南陰教聿脩巫風漸革金母之誕
曷宜子孫花王之靈終匪父母夫人生而淑令長益便
媛擅閭閻之名習章丹之術凌波微步返魂劉龔之湖
撮土爲香改卜楊孚之宅羣占熊兆競叶麟符矣當夫

梅子雨晴麥黃水漲茶園一碧花田萬紅粉白黛綠蕉
黃荔丹烹醲擊鮮列繡摘錦巨觴若屋笙簫錯乎中流
游女似雲歌吹徹以彌月翠羽低而靈鳳集蜺旌遠而
赤虹流翕赫儕真武之祠紛藉儷波羅之廟美人宛在
皓齒明眸吉夢維何犀錢玉果蓮鐙照幔疑吞五色之
霞鼙鼓鏗庭遂感三年之雹乘月返真可人如玉觀花
匪禁著手成春是耶非耶茂矣美矣夫東皇太一取儷
騷經嬌女小姑猶傳樂錄矧今嶺海清晏士女昌丰軋
犖無靈麻胡不作謂神之貺誰曰非宜固不若洛陽如
婦且致風雷又豈如襄邑紫姑惟書福慶允宜刻羽引

商撐霆裂月歌特刪其鄙陋聽益仁其和平肅答神庥
虔申祕祝庶憑毫楮達彼幽遐雖感召之實微或送迎
而不憾人徵玉燕戶慶石麟遠在扶胥江口孰詣花山
妖若小虞山中盍祛鬼母花蕊夫人而更祀非孟昶其
曷疑慶壽公主而能歌卽都尉其猶信

農具詩序一

小正月令無逸陶風農務亟矣耒耨之利取諸益者神農錢鏹之庠受厥明於上帝農具悉矣余菽麥未知樵蘇不爨帖裁乞米詩誦伐檀獨吾輩以目耕匪將軍而腹負貴農重粟宛然匡濟之談問舍求田易短英雄之氣茲以兼旬避寇八口依人閑甚閉門居然賃廡誅茅無地種豆何年豔說村居遍詢田事製原古樸如縉未見之書趣特蕭間彌切耦耕之願艱難締構無其事者有其功苦爲分明少所見而多所怪今夫不如老圃不如老農期以大人之學也四體不勤五穀不分依然儒

者之恥也吾人生計首重田蠶耕者逸勞仍關器用是
翁均期以足穀惟士獨廛夫無田竊嘗讀爾雅檢釋名
周禮考工班史食貨桓寬則論參鹽鐵宗懔則記沿歲
時汜勝九穀之書崔實四人之令

本隋書

或揭齊民之要

或該農政之全以至事物紀原農桑通訣三才圖會庶
物異名趙孟頫之耕詩馬一龍之農說業經詳載究未
了然則以歲月年深朔南地異方言迥別功用不同或
以意爲轉移或因時而迎距釐然親覩端勝習聞已爰
仿昔人漁具詩作農具十二詠鷗邊犢外業同父老團
圍星晚露初飽閱江湖滋味村春鄰火偏來局外之人

雨笠烟蓑一例農家之子所冀十雙買得投老躬耕鬻
書典研而不辭乞竹分花其亦緩風企蕭大園之言志
誰學宗少文之臥遊居有石湖樂府譜村田之什歸同
甫里叢書增耒耜之經爾

農具詩序二

昔任延化俗始教耕犁鄧艾疆兵親執耒耜嶺南早晚
種穡刀耕火種恒爲豐國舊乏雄田然而屢斥惰游爭
趨末作甚且鬥雞走狗持劍帶刀潛掛估帆遍通蠻貨
非無鄭暉奪漁獵而誰耕亦有王丹載酒肴而莫勸以
至去國召戎漏師戕吏圍城迭警橫海無功猶幸象耕
鳥耘之輩把鋤荷鍤之氓斬木爲兵揭竿爲旗振臂相
呼擗喉盡殪蓋民農則樸樸則易用民農則重重則少
私管子曰挾其槍刈耨耨首戴芻蒲身服襪襖以疾從
事於田野是故樸野而不隱其秀才之能爲士者則足

賴也。直其然矣。夫必有一耜一鑿一耨一耜一耜然後成農。縣官之鼓鑄務應員程。農夫之死生全關。器用業殊。剡耜摩蜃。端藉犀銚。利鋤。惟秣刺其無休。實本元之苦戀。陸龜蒙謂余在田間呼耕。眈就而數其目。恍若登農里之庭。受播種之法。因書以備遺忘。余深慮其忘之也。爰擬農具詩十二首。以當勸農之什。錢如牛社。當爲月會。以探名冊。比兔園。願作里儒。而教誦芒種之節。必近爲農而始知田舍之詩。仍非耦耕不能道。樊叔畧別爲條制。出意表其原難。王方慶使張機鍵見功多而共賴云。

登六榕寺塔詩序

昔度支開府振翰於同泰嘉州常侍奮藻於慈恩山人
屬稿於總持黃門著咏於僧伽莫不野會川沖撐霆裂
月觀其湧現香界凌轢中天高無有倫妙不可議亦足
以發烟霞之奇想振龍鸞之壯采者矣廣州六榕寺千
佛塔者舊名淨慧夙著莊嚴或云建於蕭梁大同三載
或謂建於趙宋端拱七年溯蕭譽而難稽紀林脩而恐
誤寺基昔改乎洪武塔址重新於嘉靖劉碑亦廢趙碣
僅存焉然其躋半空凌太清萬化千變極麗窮精銀缸
夕照珠鐸晨掣瓊簾繡栱重葢複榭耳目所玩非復人

間呼吸之氣上通帝座矣幽局旣久人迹罕至茲以城
闔跼踖結侶來游檐棲迴霧廡著飛雲敞玉牖以徐窺
跨寶輪而直上挂清漢摩流星聆雄風踏雌霓神州遠
睇鏡清砥平蠻島徐分鱗萃羽積等臺嶺乎蟻邱例牂
江如鮒轍安期巖邇下閃日光尉佗城高半雜霞采懷
聖之寺以爲帆鎮海之樓以爲柁湧地千尺刺天百尋
夫非跬步之奇觀人寰所罕覩者哉彼經列刹者實愛
靜虛之場蒔園區者亦謂清涼之所乃茲游也未越閭
井而宛得江山之助亦睇邱樊而自激風雲之氣不有
所作其何以徵憑欄意遠敢誇維敬嗣音掃壁書成不

數端明偽揚

閏端午珠江競渡詞序

珠江治游重五特盛靚粧炫服風廊水榭逐蘭槳之齊
飛俯油窓而共睇買舟而往金錢詎吝十千傾城縱觀
裙襦奚止五百歲紀疆圉閭值皋且此邦人士遞仍斯
舉笙歌聒地經旬輒聞金鼓沸天彌月靡閒裝綵作船
孰仍舊貫曳錦爲帆頓殊宿裂斯亦歲華之極侈土風
之足誌者焉僕以杜門養疴息交絕游憐綵縷之雙纏
慶蒲觴之疊泛憶自屠維時方髫鬣曾逢佳節頗洽素
懷二十年來或獻竹吟花或提鵬挈鷺或歌臺舞閣或
筆牀茶竈曾幾何時都如夢境榴花紅在誰呼載酒之

船桐葉青環人老著書之屋已分藥爐經卷敢逐鸞簫
鼉鼓惟是屢逢節物未改童心縱曇花一現別有因緣
而璧月重圓時相觸撥輒奮藻而抒懷遂極妍而盡態
或窮之想像或採自流聞亦祇聞歌而輒喚深慙見獵
而仍喜得詩二十首恰符令序相距之數人非常侍漫
勞習鑿齒之書辭地亦揚州愧演駱賓王之詩序

乙酉除夕小港看桃花詩序

夫香山菊社時恒越乎重陽蘿岡梅田候難占乎小雪
賞桂值花朝之節觀荷當七夕之天東樵西樵實多四
時之花莊頭柵頭不少長春之蘼嶺南氣候節物原異
乎中州海外文章辦香端屬之吾輩看花有約屬草奚
辭小港在盧循城畔楊孚宅旁閣則海幢海印橋則環
珠漱珠路轉鳳凰之岡村環雞鴨之沼閒蒔雜卉徧栽
野桃歲既暮以全開日欲除而齊放萬松山名蕭槭湧出
絳霞一水滌洄盪成香雨獨是殘年已逼急景將徂爆
竹巷燒桃符宅換賣癡獸而不必照虛耗其宜先歷竟

盡乎樓羅飲尙航乎文字債臺誰避獨詩書畫之清閑
盟社可寒任松竹梅之兀冪心情觸撥意興蕭然矣則
有性似白鵬身如紅燕平章風月供養煙霞卽分餞歲
之筵便作尋春之局年猶彈指耐久朋多花最銷魂總
宜船好聞鐘寺近訪白足之高僧說劍臺荒弔黃衫之
俠客釣魚艘穩更何羨乎綠篷船名放鶴僮兼未妨偕乎
紅袖則見枝枝如火齊燒玳瑁之天片片成塵密簇琉
璃之地態含風而益媚影照水以同妍香霏疑蝴蝶之
飄紅煖覆鴛鴦之宿沿岸非無芳草粧點可憐依樓亦
有垂楊分明似畫比之木棉環海枝格昂藏杜鵑漫山

血痕狼藉鉛華轉遜情韻迴殊矣於是推篷飽玩弭楫
徐移低亞則全礙艣枝零亂則密填牕格斜簪散幘天
然士女之圖蓑袂笠簷人豔江湖之夢最妨小雨搵紅
淚於羅巾恰趁斜暉鑒玉顏於銅鏡已而羹調谷董酒
酌屠蘇醉顏謔相對相當冷眼悟卽空卽色水搖空綠
下雙管以難摹岸積殘紅酌一杯其誰葬盟心學水偏
宜扇影鬟絲著手成春絕稱酒旗歌板又豈知仙城之
拉雜人海之駢闐也哉夫身世感迎年之節轉憶飄零
功名嗟獻歲之期倍深根觸是以裴晉公賢相也窮途
潦倒添商陸於殘宵杜文貞偉人也逆旅棲皇娛博塞

以竟夜吾人游歷偏屬壯年故國承平兼逢樂歲雖風
雲不感得路均遲而山水方滋杜門能謝獨話村田之
樂好花枝特寄閑情倘論香火之緣大節夜見乾淳
歲時記偏
同雅集綺懷清福曷可無詩且昔者荔灣啖荔蒲澗擷
蒲花埭春游珠江秋禊業煩圖繪并和詩章矧此閑緣
卻當殘臘繫余同好迭賞孤花比婪尾之春光羣鶯勸
客憶從頭之歲事雙鷗笑人兩槳如飛萬紅相送一年
將盡四美能兼均不容以罔識也嗟嗟模糊是岸待未
應漁者之迷津珍重此門牢記美人之處所并祝年年
花放不同劉賓客之重來徧徵各各詩成始效賈闌仙

之私祭歸來索筆誰補寫神荼鬱壘之符醉裏分牋我
仍慙勺藥薺薇之句凡有著撰均錄於篇

辛丑除夕小港看桃花詩序

小港隔珠江二十里而近柳橋渡接茶滘村通僞劉賸
美人之斜平藩建開士之宅地原南雪松樹不存時近
東風桃花早放則有文章老宿風雅總持商畧鶯花之
游安排雞黍之局聚飲未妨乎分歲闔韻便當乎嬉春
則道光二十一年辛丑歲除日也慨自海氛不靖兵氣
纔消月影蛇蟠風聲鶴警匆匆端午未賞半塘地之荷
草草重陽誰尋破廟之菊數年來天后宮菊花最盛福潮船泊蘭空
販乎素心羅浮店開梅暇採乎綠萼破竹則驚魂甫定
惜花而夙願相違耳然而談兵原易決戰綦難惜勦撫

之均非知語默其誰是閉門種菜敢自託乎英雄臨水
看花聊竊傷其遲暮耳於是船兼載鶴客舊釣鼇落帆
沿拾翠之洲打槳過大黃之渚拓琴牕以當新綠半郭
半郊張酒座以拂嫣紅一觴一詠彤霞匝地絳雪漫天
浪翻成錦繡之堆溪迴覩金碧之畫綠波未煖訝灘鳩
之先知花雨皆香期蝴蝶之同夢亦可謂送寒之別典
而更春之麗情矣斯地者甫經兵燹逼近海隅未脩廢
壘而人耕倘過戰場而鬼哭書生結客重開細柳之營
才子從戎便主蓮花之幕猶幸昇平有象能令我輩之
重來文獻誰徵合補殘年之佳話殆可傳已嗟嗟落英

芳草可當武陵之津燕麥免葵畧異元都之觀痛飲貰
酒微哦得詩爰走筆以成此序屬主人與同集者和焉

溫伊初梧溪詩畫冊後序

梧溪者登雲之麗矚也傾岑阻逕累嶂聯巖款跨紆縈
抱含吸吐碧玉瀉其漣滴白龍涵其巨波引雙派之古
潭緣萬石之空瀨赭岸藏日丹崖刺天沃霞盪雲挺壑
盤址山影相錯水聲璆然波色瀾文出沒搖漾湍走浪
激轟如雷霆煙流月迴淨若醺醪境旣深恣中復夷衍
晨鳬夕雁翱翔於其上名鱗佳蝦踴躍於其下開滌清
朗深沈幽翳松篁夏秀則百谷俱青蘋藻冬生則竟川
含綠峯紆嶺駐巒層岫衍旁有石室砒然中開嵯峨千
殊詭怪萬變錦嶂壁立疑爲洞門綺田砥平次見堂廡

奚兀橫聳可支素琴璣瓏仰空乃覲漆簡誠參寥之勝
概習靜之幽致者也山川阻深人跡罕至漁商樵隱習
而弗奇地誌山經闕而靡錄溫子以煙霞痼疾杖屨往
游秀情共馳靈境乍闢窈窕尋壑崎嶇經邱騰岌降深
仰矚俯映借訪荔蘿談計芝桂觸岫延賞尋梁契心旣
達妙旨斯傳翰墨柳州之記昌谷之詩元結之銘李邕
之序莫不暢餘陰於林薄寄幽懷於山澤者焉閑徵好

事迭賦英篇曲江樓上特繪珍圖

謂南
山師

秋水園中遠貽

雅詠

謂伊
鄉太守

裊然成帙命綴小言古寺傳觀幾如坐對

經年展玩足洽臥游已

辛巳與伊初同寓訶林卽出是
冊囑題余攜歸已閱十七月矣

嗟嗟山長水遠川陸多奇地老天荒林泉終闕靈秀自
鍾於開闢荒延寶藉乎品題不有佳游奚徵勝地若梧
溪者猿徒之所棲託颺族之所嬉處得溫子而名齊於
素玩景備於幽賞酈道元曰山水有靈亦驚知已於千
古者非與當年探陟知抗跡於龍門他日娛游願希蹤
於禽夏

春疇圖序

昔諸葛武侯之淡泊永憶躬耕司馬文正之生平猶然
獨樂青山賭墅風流唯有謝安綠野名堂經濟孰如裴
度是以古大人脩然山澤貧宰相亦有田園竹帛千秋
蘿袞一致籌邊畧裕李文饒記撰平泉憂國身閒韓忠
獻詩吟老圃辛棄疾以稼軒自畧沈慶之且桑田獨行
烏帽歸來杜衍業非居士白衣侍從鄴侯原是山人此
我黃大中丞石琴先生春疇圖所由作歟惟公辰象誕
精雲司總讞守文應變後樂先憂殖產業以奚爲購園
亭而可住五人之智不及韋公三絕之稱誰如李揆作

督有朱衣之報論兵非霜鬢之年記事持珠秉心懸鏡
器真台輔呂端忘喜懼之容望最高華蕭復勵嚴方之
節日者瀕海烽煙諸營刁斗 命襄戎幕誓斬樓蘭旣
擁節於江南復移旌於嶺外桓寬謀國魏絳和戎張英
國之威名交趾當開郡縣富鄭公之出處契丹會議金
繒卒使吐蕃爭拜汾陽疏勒同依定遠珠厓永奠銅柱
屹然 特予轉官洊令撫粵少年八座浹歲三遷韓麒
麟之拜齊州未階臺省劉之亨之爲節度前舉秀才徐
懋功無異長城滿景侯有勛方任弩牕矛穴十字門開
翠羽明珠三巴寺肅兼年累載火種刀耕課雨量晴食

香衣果功同馮異卻聞大樹之稱醺共王珪定協名花
之瑞顧獨繪斯圖者某山某水半郭半郊細雨一犁斜
陽幾稜落杏天桃以外農蓑圃笠之間杖屨有香鬚眉
盡綠緬懷古聖辛甫里之經存誰詔世農識泉明之語
妙如譜村田樂府集仿致能徧題耕織畫圖詩同孟頫
說者謂農業首重耕耘官箴尤先勸課故或備飯水於
樹下或賜酒茗於木陰或單騎可巡或芒屨而立特著
文辭於亭障且載鉏耒於輶軒杜畿本有章程黃霸尤
須精力持原未熟宜爲陶侃所鞭刈始非難當憶范雲
讜論待講明而樹藝淺種深耕苦煩碎而推行貴農重

粟而不知諭蒙書在本極尋恒理縣譜藏第煩表率說
者又謂公有投印釋紱之心已決捨冕辭蟬之計詩誰
招隱賦比遂初松菊猶存糧藥有寄歡歌園藪晦志山
田東路歸先西疇事始白香山之宅粟並琴尊員半千
之莊花環碾磨齊賢觀稼特造臥輦郎簡種蒲更築別
館居鄰南澗之寺業守東岡之陂犢外嘯歌龍眠圖畫
而不知波恬塵靜去留均出於無心嶽降崧生賦畀原
期於有用方今運厯承平道存匡濟天生李晟而爲
國帝知祁吉之憂邊倚畀正隆遭逢可想造生靈之福
命名合紗籠擅嶺海之清忠例邀錦賚又况元宰夙知

文惠蒼生同望深源願借寇恂歡迎郭伋仍嘲小草輕
擬赤松樂鐘鼓於何時功酬明聖起樓臺而無地望
重華夷舍我其誰伊人宛在卽冀仲長樂志騎省閒居
平子歸田是翁知稼原覺蕭閒之可味轉忘勲業之爛
如耳阿衡調鼎依然耕野之心元聖缺斯早有明農之
願序之如此圖固可傳

駿馬圖冊序

代

蓋聞行天莫如龍行地莫如馬是以夏后六龍周王八
駿帝王衡鑒固自不同若乃魯僖垌野秦穆沙邱或獻
衛青旋歌鮑永專征交趾門更金馬之名貴極人臣家
有白駒之瑞公孫號爲義從尉遲引自敵軍哥舒加以
朝章彥卿真推神將羶越三領羨秦胡公之威名虬坐
九花企郭汾陽之勲業曲端鏤象姚氏青獅將相所乘
古今同豔好非齊景索何待於按圖妙數江都畫幾同
於待詔已惟宗室某公天宇孕靈仙源積慶幼荷騏驎
之賞誰工蛺蝶之圖賦和高松射惟甘蔗才兼文武學

洞天人望重華戎德孚中外乃者待作相於 朝右

命閱兵於瀋陽身繫安危治隆揆奮佩玉魚而許讓鑄
金兔以旌能政共美其棲鸞經偶繡乎相馬道以卻走
生符太平取無畱良畫舉成數爰屬金門畫史沈君爲
駿馬圖冊焉衛節度之赤驃如此輝光高都護之青驄
歛然聲價權奇倜儻奮躍嘶鳴畏長孫晟之來稱爲閃
電試翹神奴所驚屑取生塵觀其風髮露鬣文臂花肩
蚪踊螭騰麟超龍翥或仍赭白或果翠黃或似綠蛇或
如赤兔或毛捲雪或額帶星各各飛霞篇篇皎月蕭疎
縱恣深穩清高瘦瘁何妨撫的顙而誰笑去留早定惡

旋毛而轉憐智識不凡喜齊王憲之所擇材力致遠善
岳忠武之所言已夫燕臺招賢不廢朽骨漢室求士乃
及奔跼鹽車喜伯樂之逢何人知已束帛致子方之贖
窮士歸心千里馬本屬寓言九方歎烏能數覲惟公特
存眞賞曾具別裁駕馭直等乎英雄神武何勞於肅殺
遂使乾清坤謐塵靜波恬刁斗不驚琴書獨擁輕裘緩
帶鈴閣蕭然雅歌投壺射堂肆啟三軍肯令其自在八
座同許以吉祥荀叔本善於謀造父忍窮其力各極腹
心干城之選翕然疏附奔走之材竊覽斯圖得其命意
古有令爲四正特獻駒駝亦有乘到三年不知牝牡後

先一揆聖哲同符已至如塗金藥玉仍別歲時環瑣銀
槽特誇豪富道人支遁處士伊祁負李幼清之獨知喜
虞仁基之能馭顏延之之所賦李廣利之所歌方斯蔑
矣某久慙伏櫪仍愧知塗聊爲款段之乘敢作丹青之
引喜盜驪之不廢知飛燕之能呼御誰比於惡人問敢
遺於童子肅然州部當爲從事之祠倘出羌戎豈入然
明之廐纖悉具備獨羨甯王畫圖雋逸不虧宜致慕容
銘讚

珠海老漁圖序

南山師非漁隱也當其業擅屠龍心雄搏象策六鼃而
渡海乘獨鯉以朝天未建坐茅之勲亦預賞花之宴以
至懸魚操勵驅鱗文傳拯蟹稻之偏災裕蠶桑之生計
昌黎宦况亦有釣臺之高單父政成且聞漁者之肅旣
而平子歸田江陵買宅卻餽遺而辭劍忘險易而收帆
所識豈菰蘆中人相賞有濠濮間意笠簷蓑袂疊舸單
舟園擬辟疆友皆陶峴譜蕢洲之漁笛營花埭之鶴巢
慶流鶯之比鄰招舊燕而入社笑盟心於止水煙雨一
龕等過眼之浮雲松杉半頃白鷗識路黃蝶親人廚近

積香齋名搖碧舟同元禮便詔神仙船認米家但載書
畫集賢問訊案有黃庭遺民忽來船無繪具客製洞簫
之謚仍喚小紅人披宮錦之袍咸知太白爰自號珠海
老漁焉至足樂也然而風煙度度兵燹年年曾漂寄於
滇江久棲遲於泌水賊帥則錦帆颺閃禍起揭竿蠻酋
則鋌軸巍峩勢矜破竹豺牙厯厯虺毒冥冥禍更慘於
孫盧鬻殆連於中外鶯花岑寂蝦菜蕭條斷井頽垣炊
煙明滅叢蘆折葦漁火闌珊屢閱桑田半成滄海之水
偶還栗里安覓武陵之源亦可以悽愴傷心者矣乃能
琴尊無恙杖屨飄然宏景移家伯鸞賃廡南村小住北

郭聯吟賀季真居定鑑湖王摩詰堂迴輞水手移蒲柳
家富芰蓮孤艇殘春一竿清曉管幼安亦藜牀穩坐韓
稚珪則菊圃晚香煎雀舌於籬間藝龍涎於橋下玉缸
金戟白舫等詩散髻斜簪紅衣入畫謝太傅中年陶寫
東墅圍基蘇長公舊日因緣西湖歌扇桃花流水載聽
樵青棹謳楓葉斜陽遠軼菊莊圖卷

園初徐菊莊太史鉞有楓江漁父

圖續苕溪之餘話完笠澤之叢編頭銜但署釣徒手撰
幾同漁仲不可謂非厚幸已嗟嗟鯨鯢偃蹇蛇蝎分明
牧之禪榻鬢絲老杜青鞵布襪然犀共推溫嶠斬蛟能
學飲飛釣弋何心釜鬻載詠祖豫州之翊晉擊楫江中

范大夫之滅吳刺船湖裏繙列宿之像反遜羊裘飽五
侯之鯖不如鱸膾先生歸也逝者如斯其釣維何伊人
宛在問食雁而何妨報謁觀打魚而未敢留題且啖蛤
蜊果如螃蟹澄清有願崔與之劍閣詞工欸乃如聞許
可用圭塘集定斯圖之作夫豈偶然瑩託業無由卜居
安往或移情於海上誰招隱於山阿願結網而徒觀聞
乘桴而輒喜斜風細雨推篷亦弔湘娥時師正悼亡剩水殘
山腰笛誰如李委非夷非惠永懷孔思周情半郭半郊
足抵仙宸帝所俯仰吟歎濯足扶桑釣竿欲拂珊瑚衣
桁常鳴翡翠魚多尺半誰賡甯戚之歌士本無雙迴異

淮陰之釣或慶八旬殊遇辭渭水而奠河山庸知兩廡
他年返江門而談風月爾

粵東市舶諸夷圖像冊序一代

昔梁蕭繹有職貢之圖唐賈耽有華夷之述以至史家
之稱四裔說部之叙百蠻類皆豔說威靈侈陳德業奇
徵鵠血堅例魚膠半屬流聞第存疑信若乃攻心爲上
詘膝請和置州豈以寬宥爲名款塞第曰謙亨之福王
忠嗣之特重唐休璟之練知似亦無煩覲縷已惟我督
部師仲升徐公陶士行之忠盡張英國之勛華任寄安
危治兼揆奮召公夷疆理南海淮夷來求寇平仲鎖鑰
北門宋廷無事緊進城之舊約原互市所習聞此輩非
孝子順孫中國實仙宸帝所此疆彼界爾詐我虞虎兇

能馴蜂蠆有毒溫彥博之議能奪鄭公何承天之論不
如江統師乃出獅洋登獸艦推心置腹諭以機宜落角
摧牙平其桀驚楊越公之威望原比江神吳子顏之勇
謀隱若敵國卒致瑞錦作頌丹砂示心塵靜波恬陸誓
水慄珠厓銅柱氛禔全銷翠羽文犀消息仍舊某獲隨
龍節遠涉鯨波夙仰韜鈴親聆警欬才如新息喜百粵
之胥平來卽令公覩諸夷之羅拜仍訪畫工繪呈此冊
旗幢刀劍男婦賤良或火徼風車或繩行沙度或魁頭
露紒或寶扇金冠或似雁臣或如龍戶境殊種別道一
風同敢知別有肺腸各具本來面目貽范仲淹之腹裏

饒有甲兵在張宏策之目中待爲圖測知集思而廣益
比顯德以褒功樓未築而籌邊驛舊題曰懷遠思職奚
煩於馭吏爭錄丙少卿之科條奇勛乃奏於儒生此亦
龐穎公之圖史伫封拜之 殊錫仍宣威於虎門宜中
外之翕然更畫形於麟閣

粵東市舶諸夷圖像冊序二 代

自昔鄼侯入關收圖書而知阨塞德裕鎮蜀繪部落以
禦蠻蕃是以職方版籍訊其風土山川主客送迎辨其
等位名數然而政關合市畧著籌邊撫夷當萬里之衝
經年罷戰開府極一時之選列爵崇班合寫王會之圖
便作太平之頌若我 宮保師崑臣葉公者諸葛後身
文成再世韓雍材氣宜藤鼓之永存葉盛威名獨椰瓢
之不取蠹爾英夷居宜蠓鏡本非仙侶許住羊城實爲
持節所專司端賴轉圜之妙用姚崇應變學宋璟之守
文元齡善謀藉如晦之能斷十萬兵之易辦仍仗齊邱

二儒帥之交推夙稱從譙府原都護渡海任載乎鏃船
城是受降劃河逕操乎玉斧人如韓范難得並時望重
華夷說均遠者久已被我純續帶我金犀沐和殄恩永
作外扞某猥蒙獎借特荷陶甄固當仍備蠻防敢謂習
知邊事乃倩畫人寫呈此冊凡屬梯航所至原異乎苴
茅並無城郭與居何勞於聚米倖獲時陳几案宛然戒
外之游懸知不下堂堦遍悉寰中之故旗襍五色刀鑄
雙環尊卑各殊男女有別或鞞巾祝髮或深眼多髭衣
裳班蘭服飾奇詭或纏白紵或裹青氊或以鳥羽爲冠
或以鹿皮作袴或齒真如漆或鬚更傅金情僞固早悉

於目中反側更可運於掌上耳李臨淮之號令氣色增
明裴子野之畫圖懷來紀盛火珠金合石蜜明膠文軌
一同鞆譯萬禩丙吉憂邊思職誰看赤白囊馳褒公入
相進賢會見丹青引作他日並圖職貢當借臨摹遠夷
願繪儀容可知冑望

鶴山某鄉文社序

昔文格創自舒王而特崇八比選典沿於明代而久廢
諸科卽誇命世之才亦貴顓門之詣又况儒林文苑並
勗於他年賤啟風流交推於爾日歎尋白社約倣藍田
若鶴山某鄉文社者良足述已丹厓宋子著作之才英
靈所萃尋僧下榻與僕推襟爲言其鄉同社諸君有是
舉焉門皆通德村豈秀才或族茂兮宗生或望衡而對
宇才如曼倩不妨攻奏牘之書學似江都亦預對賢良
之策他題迭請眾作參觀檢絕句孤經程月書季考共
揣摩乎簡鍊爭剖釋以縱橫誰明殿最先嚴繆種之流

傳欲仁巍我尤貴一場之警策且也文章行誼各證以
同原科第功名亦期其並擅言忠言孝端不愧於楷模
讀史讀經欲預培其根柢歲以醵金所贏祀司命之神
而籲景福焉洵大邑之休風而名鄉之盛軌者矣粵自
一王制定偶體文興工帖括者乃曰通才中繩墨者
斯登上選遂有徒誇掇拾卽詡崢嶸問孤竹而不知脫
畧刀其亦幸亦復錦標銜得珊瑚搜歸藉一第以還丹
撫半生如拾芥遂聲華其自侈致才行之交譏亦有鄭
鄉樸學梁苑清才謂黠竄其非難笑囁嚅之不事裏白
袍而角藝燒樺燭以程材然而英雄未入於彀中坦率

空傳於膀後以盛名李廌作下第劉蕡念衣鉢其誰傳
聽弦歌而屢誤若斯會者不亦末流之藥石而名輩所
鍼砭者哉僕譽慙苦李材謝散樗敢執鞭韉以相隨聊
誌敦槃而作序魚龍漸化平時孰漫居其先龜鑑倘如
他日知爲得人賀

樂志堂文集卷五

樂志堂文集卷六

南海 譚 瑩玉生撰

擬三月三日蒲澗修禊序

粵自周傳洛飲東廣微特考遺文鄭載漆詩蕭穎士閒
微逸禮秦樓漢苑往事相沿南澗東堂流風迭盛況以
人和歲稔是裴令公游宴之辰風變俗移有劉孝綽賡
誦之實訪神仙於水曲共賞韶年畱賓從於山阿爰祈
介祉雅游旣愜勝地斯傳矣蒲澗者白雲之勝也崇山
四匝古木千章峯巒當秀絕之區花竹有翛然之致巖
櫳複翠抱朴子之所曾游岫室縈丹安期生於焉永駐

亂石犖确清淙淼漫欽峯飛百尺之橋凝澈抱雙溪之
水亭思邀瀑池訪流杯逢佳日於春秋劇歡場於文酒
但作遨頭之會琴鶴皆仙况當婪尾之辰谿山如畫則
有南樓庾亮東墅謝安張檠戟於三城駐幬帷於百粵
海山清晏萌庶昌丰喜僚佐之皆賢樂簿書之既暇孫
瑒出鎮時有長江之游羊祜征南每作峴山之宴維茲
季月逮此元辰言訪山泉展修禊事時則桐枝欲乳柳
幹方穉四山皆躑躅之花十里半芥監之菜郊原雨過
色萬變而皆青草樹風來花無香而益媚晴光瀲灩陰
森分水木之華雲氣空濛金碧側樓臺之影則見輿輪

載止騶從無聲屏阜蓋以逍遙跨青筠而偃泊元稹鏡
湖之會文士偕游梁祐維水之娛時賢並集命儔獻侶
連襜倚裳緣茵壁沂筠壇越芝屢陟松磴丹梯九折玉
簾兩重心跡皆清鬚眉盡綠於是授几肆筵羅尊列爵
臨清川而分席任激水以迴觴解帶山中湔裙水上潔
新濯故祈吉蠲疴浮絳棗以如瓜醉頰鱗而若鯉昌黎
入座先彈綠水之琴仲御乘舟可市丹邱之藥紅牋對
擘綵筆橫飛清微則欲證仙心散朗則並耽禪悅賞心
樂事俯唱遙吟飄飄乎浩浩乎不知朏魄之淪精曜靈
之匿彩也嗟夫趙王疑塚覓異寶其安歸劉龔荒陵撫

斷碑而不見鷓鴣啼處棉紅北郭之山蝴蝶飛時草綠
南園之地芳華苑裏但噪蝦蟆歌舞岡前久游麋鹿弔
古者於以歔歔游春者因之優悒卽謂仙山佛屋慣閱
興亡眞館靈祠詎經寥落而幽壇月黑荒竈苔青風摧
寶樹之林鳥拜金幡之座鶴舒臺敞盡城闌香火之場
虎跑泉清半士女壺觴之地亦復世殊事異樂往哀來
此右軍山陰之記所以寄慨於死生而子安永興之文
又復增懷於愴恨也乃茲游者勝情相引逸興遄飛緬
陳迹於古人極娛游於暇日林邊跌宕花裏沈酣鏗爾
瑟希卽沂水春風之撰超然元箸在子房季札之間講

德端賴於儒宗說詩兼聞乎國政固遭逢之特盛亦風
旨之各殊已望蓬衡叢品樗散陋姿命擬小言敬抒良
會慨想南皮之景曷賦朱華深慙東野之音難希白雪
後車如載惟應罰酒三升前席未陳不止成詩一句

清暉池館春禊序

昔梁蕭子範有家園三日之賦焉是故人如內史何必
稽山記有侍郎猶然洛浦疏圃之流風可紹平泉之韻
事應增矧以王武子之清言許阿戎而並助郝參軍之
蠻語知桓公所習聞樂旣愈於古人陋亦詔之來者紫
垣孝廉門推韓穆譽美揚班玉樹年華金荃著撰一家
詞賦誰別室以處楊惛蓋代才名仍下榻以留徐穉擅
烏衣之門第惜錦帶之光陰夙富亭臺雅宜觴咏歲在
甲午誰曾讌春日匪重三未妨用已乃集同人脩禊於
清暉池館焉僕交訂久要敢爲雲以相逐來占不速非

因雨而竟留矣於時桐花糝逕柳絮飛園榕翳日以成
陰棉漫山而似火新綠倣聞鶯之館冶紅堆撲蝶之天
落英則香覆鴛鴦深樹則色藏鸚鵡萬松磊砢錯以芬
菲一水縈迴盪成金碧於是坐兼童冠談倣張裴對擘
華牋傳觀雅什吟懷旣鬯繪事多工絹素新裁丹青風
擅寫禽魚之意態摹花果之精神次第相催回環盡致
詡吾宗之墨妙合眾手以圖成蓋同集者二十一人能
畫者十一人而君家且五人也盛矣哉迭舉兵棋仍呼
伎樂王介甫何能疾應任苦神思謝文靖未至中年偶
供陶寫旣而東堂炙辦北海尊開斜暉挂林新月墮水

布綺席標華燈揮玉缸拍銅斗歡誰有限醒各欲狂茶
茗可以賜侍中車輪可以括司馬賓何知其既醉主更
語以無歸庶不孤風浴之懷原非泥被除之旨嗟嗟英
雄事去越井岡荒風雅道衰雲淙墅廢况鄰笛之易感
竟人琴之俱亡

謂春嵐都轉

悼春草於池塘痛陳根於邱壟

嘆今昔之同盡知合離之靡常又况君方淨浣乎征塵

僕

始歡聯乎舊雨飲耽文字原徵逐而無奇厯檢樓羅

恐低徊而欲絕卽如君素交者楨伯明經秩卿文學晨
夕相守參商各違則

僕

與斯游又烏能以不記他日者

或錫宴曲江真成宰相或抱琴太學終是儒生對似廣

微自無慙於侍從游同仲御亦何愧乎隱淪感切搏沙
情深撫卷耳曲水序工君待擬元長之筆西池句劣僕
何辭仲玉之嘲孝廉先成四詩會者人各有詩僕擬和
四詩而先成此序卽書之卷端

閨上已花田脩禊序

昔厲樊榭徵君續集有閨三月三日湖上續脩禊之詩

焉誠以藍尾春光已越九分之九豔陽天氣又經三月

之三百年良不易逢此日尤爲可惜謔相將以勺藥誰

分別離志榮辱於牡丹果占亨泰牡丹榮辱志花所以

農山製曲卻賡文水之詞古今類傳董穀士有閨上祭

酒徵詩仍效蘭亭之體矣吳穀人續集有閨上已重脩禊事仍效蘭亭體詩恰

當佳節宜續雅游况地原金粉之遺益人遂琴尊之樂

花田在城西十里宋方孚若南海百詠謂劉氏時美人

葬此平田彌望皆種素馨花三角市旁誤徵河北萬松

山側實署莊頭天經一雨晴時紅稠紫爛人住百花深處海晏山明昔是埋香瘞玉之場誰泥續魄追魂之說則見一碧成陰萬紅作雨送春則折餘楊柳計日又開到酴醾妒煞居人以花爲業宛然田事無地不香營小築而村移傍幽棲而市闢逐香風而打漿水碧於羅乘曉月以提筐霞明似繡香魂何在忍言玉匣珠襦軼事空傳合付酒旗歌板於是朋招耐久船僱總宜豔說前幫閑微捧劍靚粧炫服朶翠盤珠天增一月之春况經良節人寄今番之賞倍惜前塵占得名園重簾肯捲引來曲水殘酒猶香韶年九十春歸平添百二吾輩兩三

人在足抵萬千相與商榷是非流連今古未妨蠻語亦
祇清言賤暑薛濤書參衛鑠降幡鎖鎖不無弔古之詞
翠羽明璫間有招魂之句深情若揭逸興遄飛浩浩乎
落落乎不知深樹之暑移落英之風緊也已而斜暉紅
抹新月黃拖幽磬遠聞涼鐙欲上蕢林婆之醞呼宋嫂
之羹倚闌則紅藕葉香布席則紫藤花墜倩黃頭以進
饌遲紅袖以按歌薌澤微聞一石亦醉韶光不負千金
肯辭帳羅袂之無聲姍姍欲出覩玉顏之偶到采采工
吟茅舍竹籬菱汀蓮渚畫孟琴襦扇影鬟絲唱懊惱之
詞留春竟住檢樓羅之歷問夜能歸洵足結花堦之勝

緣補禊堂之遺事矣嗟嗟金雁不存玉魚安問遠憐青
草之冢近矚百花之墳博白有綠珠之村豐湖有朝雲
之墓猶然頑豔同付劫灰兒女閑情偏隕英雄之涕淚
風雲變態卻論花草之精神徧詢僞漢諸陵轉讓美人
坏土嫣紅姹紫宛然逢絕代之人賸粉零香合作惜餘
春之賦筆牀茶竈散髻斜簪韻事亦多良時難再傷如
杜牧作揚州夢以何遲才匪少陵賦麗人行而重續恐
永不得復爲今日游也客難留住雨同梅子黃時焦氏類林
陸機以三日雨爲留客雨人且詠歸水尙桃花豔絕同集所著并錄

於篇

咸豐癸丑柳堂春稷序

維咸豐三年暮春之初席帽山人返自化州久寓街談
老屋錢爭助國委勸捐輸夫可當關令諭防堵原難
誓墓甘讓昔賢容易杜門怕論時局連宵微醉竟夕枯
吟夜漏漸闌朝暾又上則上已佳辰也夫人非內史曾
屢集乎重三代豈永和卻恰當乎癸丑撫今憶昔感遇
懷賢業春光之難留仍禊事之不舉癸鶴笑汝啼鶯惱
人則有子黼李茂才嘯儔命偶挈鷺提鵬跌宕嬉春矜
嚴選客彼蒲澗本神仙之區珠淵原烟月之藪海幢鐘
磬花埭笙歌觴詠夙宜

皆余昔曾脩禊地

心情不屬遂乃倚裳

連襪范水模山恨畧比於思光狂兼似乎棄疾座中佳

士半曾入於畫圖

主人舊有乙己春禊圖卷

嶺外閒官特先載其琴

鶴相與同集於柳堂焉柳堂者茂才著書之地山人疇

昔輒相過從者也悵念前塵倏經廿載愴懷舊雨睎見

幾人

謂尊人孚亭詹簿暨區仁圃先生黃文緣學博

桓宣武之重經慨然興感

劉丹陽之篤志清德不衰矣於時春水方生午風驟暖

間棟花之消息聞梔子之光陰躑躅全開酴醾始放藤

身老大竹筍平安其人如季札子房此地卽崇山峻嶺

一邱一壑半郭半郊新潮謁忠簡之祠南雪望議郎之

宅研經證史讀畫評書暢敘幽情後先一轍言兼雅俗

語及鬼神下上千年馳驚六合話惠潮之俗悍誰挽澆
風弔吳楚之國殤同當殺運憂民憂國盍報深源之書
籌餉籌兵易隕新亭之涕嗟嗟會有簪裾飲惟文字傾
尊壘於北海連几榻於南樓且食蛤蜊定舞鴈鵠引池
則蝦菜入饌隔牖之鶯花侑觴摘新綠以題詩踏墮紅
而換酒仿文忠之東墅亭開邀瀑以流杯近典籍之南
園軒紹抗風而撰集古有泥濯故潔新之語招魂續魄
之言固自不同亦何必學已而殘霞比繡新月當眉沿
街則語燕仍留傍水則流螢相送溯自秦樓漢苑說豔
帝王南澗東堂風傳魏晉古人盛集原極尋恒吾輩閒

緣居然王謝時原難再事縱偶然均不宜以罔志也陳
獨漉曾題煙濬依然幸值太平蕭子範續賦家園庶幾
無負佳日耳同集者張南山先生黃香石舍人艾至堂
明府喻少白參軍杜洛川學博主人則茂才也約而未
至者許小琴少尹鄧蔭泉中翰樊昆吾上舍茂才年最
少而山人次之以道光癸巳而後山人實屢縱飲於此
堂遂不辭而爲之序云人各賦詩勿限體韻

賞雨樓展上巳詩序

嗟嗟定銷魂地倍易句畱特稱意時月令孤負生平雅
集慣觸撫時之悲明輩遺詩多緣弔古之作若乃喜吾
宗之憂國恒願豐年與眾樂而及時固當排日談多稼
穡陰晴占九十之春佳卽林皋觴咏惜重三之節此譚
子博泉所以新築賞雨樓落成約同人而展上巳也溯
自島夷構釁戎府宣威倖保安全爭虞亢旱王山師海
憶殺氣之峻嶒寒食清明痛韶光之拋擲愁心撩撥逐
芳草以俱生樂事因仍隨落花而共減矣猶喜珠崖銅
柱咸知道路之難朔雪炎風共仰忠良之翊博泉居比

軟紅年猶慘綠氣豪湖海迹託神仙風塵契花竹之緣
城市得山林之趣一邱一壑原稱樓居半郭半郊特開
詩境杜門卻軌日埋頭於樹陰課雨量晴歲關心於穀
價樓名之署概可知已爰邀古懽共結良會鱸江魚以
入饌徵林鳥以作歌尙屈鶯花之辰不徒雞黍之約王
孝孫云滄海橫流到處不安王司州云人情開滌日月
清明撫今憶昔意興畧殊矣珠江春禊屢結勝緣炫服
靚粧疊舟單舸頗乖歲暮無荒之旨宜致日中則昃之
占若斯會者城闔地僻案牘身閒敢淪風浴之盟誰管
安危之局餘花晚筍散髻斜簪笠屐同來作水天之閑

話輪蹄幾度談北地之壯游庵中張南山先生羅崧生封翁多述都門舊事羽
檄未停錦帆猶在東風如舊干卿事以重提春月將圓
稱詩家而共語慙坡老而作記喜雨宜名繼司空而品
詩買春復醉同集者曰是不可以不誌於是人各闔韻
賦詩余特泚筆以爲之序云

三月二十三日容園補禊序

上已修禊古來綦重吾輩特宜所謂良辰美景賞心樂事也茲以丁巳之年建辰之月夷舶漸退戎幕猶張俟詣闕以請纓擬渡江而擊楫移家安往避地仍還逢佳日而不知憶舊遊其若夢亦偶偕釣游之侶稼圃之農相與挹清流撫白石遶疎竹蔭長松意興蕭然毫楮斯輟則有笛舫奎垣兩陳子以二十三日邀余展上巳於城北之容園環翠亭而補禊焉天惜餘春猶當韶景人忘元已敢負雅游便擬紫蘭香逕之行宛然老樹遺臺之感嗟嗟被髮類戎屑仿伊川之祭椿喉殺狄終觀

駒門之埋而乃芙蓉此醉陡作腥風罌粟猶香偏含毒
霧霹靂敢關幪幢若飛草木皆兵矢石同下烏龍蛇虎
猿鶴蟲沙鐵颶嶙峋銅礮抵流花橋外銀濤颶閃錦帆
張得月臺前邁此不祥祓除宜亟斯園也宜烟宜月半
郭半郊樓對遠山門臨流水蕉竹成列菱蓮早香室邇
人遐池平樹古蒼苔半畝偏逢夢得之來寒菜一畦合
誦蘭成之賦亦復犀渠鶴膝緩箭強弓狐妨夜嘯於澤
中虎慮日行於市上三城無恙重鎮巍然報獅子之洋
襜赬氣奪望大王之潛畫角聲消濯故潔新齊心同願
已舞如意以命酒撫干將而作歌麗人不來誰擬閒情

之賦戰場非古終妨變徵之音縱云風景不殊河山如
故無煩戮力而感慨繫之矣花竹換風塵之警英雄屑
兒女之悲旣慙顏延年王元長之序體工對颺復媿裴
逸民張茂先之談旨契元妙撫時感事聊以記言峻嶺
崇山倘如內史之暢新蒲細柳畧異杜陵之哀爾同集
者張南山陳棠溪兩先生陳鹿萃孝廉倪雲衢桂笙陔
兩上舍兩主人暨余凡八人

白雲秋禊序

秋禊之典始自劉楨所賦焉昔在魯都剛逢二七茲游
粵嶠恰展重陽未殊洛苑之嬉何減稽亭之會白雲山
者羊城之望也重嶺干霄羣峯隱日巖層岫衍澗曲崖
深林藿綿濛水木明瑟安期方士曾此飛昇景泰禪師
於焉棲託泉浮雙蟹井伏九龍三教之殿倘存七仙之
寺仍在虹梁螭桷風牖雲楣金利新開香城復建我東
卿太夫子就養經年來游鎮日喜名山之附郭驚令序
之到秋爰開禊堂同陟淨域人似劉宏山簡宴賞原宜
客如裴頠張華論議可聽則有楊詒園何子貞兩典試

水鏡高懸星輶未返何樸園蘇賡堂陳棠溪三山長巾
褐無悶杖屨偕來依然風浴之懷匪泥祓除之義時也
清風已戒晴日始涼葭露欲霜松嵐如雨桂飄香而結
子蘭含馥而作花石氣尙濃泉聲轉厲相與盼摩星之
嶺緣滴水之巖據盤陀披叢薄禪僧老大蕭閒易至百
齡名輩畱題存滅並堪千古訪丹竈剔殘碑期仙壽而
掇蒲樂年豐而觀稼流杯池涸經越井之荒岡邀瀑亭
空弔雲淙之舊墅話歡場於昨日樓閣五層訂後約於
他年羅浮雙屐已而東堂行炙北海傾尊酒定送於王
宏茶宛烹於陸羽莫問明年誰健何知百事俱高得喪

兩忘是非雙遣如謝安之侍坐曾講孝經如李泌之定

交同用清字談討芝桂借訪荔蘿其人殆季札子房此

地有清湍脩竹玉版之吟牋對擘金壺之贐墨橫飛間

坊本住癸辛同羨草牕之著撰今歲恰逢己酉盪廢栗

里之詩歌時道光己酉九月十九日原唱和陶已覩搖

落以寄懷適莽蒼而散賞笑謝鎮西之泛牛渚鄰舫咏

詩學桓宣武之醺龍山參軍落帽喜拍銅斗笑俟如花

之按歌醉倒玉釭何知若木之匿景文正則經從錄在

誰屑臥游襄陽之耆舊傳成宜增軼事已夫張居業愛

山川風物林榭特營呂聖功有花木亭臺壽觴迭舉趙

朴遍游名勝蕭嵩脩蔣園區原今昔之美談亦尋恒之
豔福若此會者飲唯文字交本雲霞共爲人外之游同
作天際之想坡老緣荔枝而度嶺葛洪須藥物以延年
笠屐如仙鬚眉入畫昔年獻序曷愧顏光祿王甯朔之
奇此日題詩轉覺劉夢得宋子京之玳幾同仲御眞作
隱淪共推景陽夙稱才子早流聞於中外足增重乎江
山昔王文成父海日先生晚年書楹帖云看兒曹整頓
乾坤任老子婆娑風月唯太夫子足當之耳瑩傑閣未
登才非王勃後車如載對亦摯虞敢期 錫宴承恩仍
慮催租敗意辱示丹青之引足誇翰墨之緣詩同北郭

聯吟圖勝西園雅集一觴一詠兼簡刪鄭國之篇無雨
無風尋菊俟駱丞之序

荔園消夏序

荔支洲爲僞劉昌華苑地千年興廢金粉飄零卅里迴
環圖經鬚髯一灣流水幾稜殘陽細柳藏鳥新萍睡鴨
僕

過者屢矣話疇昔之讌游愛蕭閒之詩境偶作看花
之局都緣啖荔而來柔艣一枝素琴三弄僧邀行腳友
訂盟心鄰犬吠人閒鷗識我魚莊蟹舍粧點海雲之紅
菱渚蓮汀平章天水之碧度阡越陌揀樹論園課雨量
晴食香衣果記從嘉慶庚辰以迄道光己亥波恬塵靜
歲稔時和村落太平閭閻安樂家家選勝各各搜奇開
逕招邀引流臨眺白侍郎之宅定饒書庫琴亭王摩詰

之莊共愛竹洲花塢顧名思義反無冬夏之分踵事增
華轉有滄桑之感矣亭臺映日棟宇排雲炮鳳烹龍鏤
金錯采珠歌翠舞錦纜牙檣何來縞帨青幫賸見疊舟
單舸斜簪散幘居然節度之園大槩油囊原屬將軍之
樹友非金谷充庭則鏡炫珊瑚地近珠湄隔水則燈然
茉莉此亦荔園極盛之時也慨自海島之夷氛不靖粵
人之生計可知物力已殫戎心易啟城闔咫尺士女嬉
游繁華喧闐寢不逮昔豈還淳而返樸已拔本而塞源
宜充耳而弗聞誰仔肩而可了或威靈之震疊庶運
會之轉移耳近且燐火徧於湖湘烽煙達於淮海仙人

樓閣神女壇臺木末琴尊竹西歌吹各苦風流雲散同
哀地老天荒桃葉渡湮頽垣斷井蓮花涇涸墮珥遺簪
唯此佗城里巷依然市廛如故八橋烟月五管鶯花高
臺未傾幽築猶在今者曉月初墮晨霞欲然朱實離離
冰丸的的筆牀茶竈別論香火之緣沙鳥風帆偶踐茶
瓜之約林泉清暇水木陰森聊假日以消憂且及時而
行樂亦不可謂非厚幸也已荷風澹岩竹露澄鮮各尋
柳而問花更浮瓜而折藕金盤玉筯嘗新遲消息之來
雪碗冰甌逃暑覺心魂之爽作嶺南人而最樂問江左
事而何知且不必愴恨乎霸圖更何暇評量乎時局也

哉同集者若干人人各賦詩而僕爲之序才非李廌未
記洛陽之名園飲學鄭元庶同河朔之高會

樂志堂文集卷六